

**Reglament per l'utilisaziun dallas vias e sendas
communalas dalla vischnaunca da Falera**

Reglament per l'utilisaziun dallas vias e sendas communalas dalla vischnaunca da Falera

I. En general

Art. 1 Marginala: intent

Quei reglament determinescha l'utilisaziun da vias e sendas communalas e dil terren communal entras vehichels a motor, motos e mopeds sebasond sin art. 3 dalla lescha davart il traffic sin via (LTV) ed art. 7 ed 8 dalla lescha introductiva tier la LTV (LitLTV). El cuntegn prescripziuns dalla polizia stradala.

Vias e sendas astgan da principi vegnir utilisadas da vehichels a motor mo sch'il reglament present ed ils indrezs technics avon maun lubeschan quei.

Art. 2 Dretg subsidiar

Sche la lescha prescriba nuot auter, vegnan applicadas sco dretg communal tut las determinaziuns corrispudentas dil dretg federal e cantunal.

Art. 3 Scamond general da carrar e da parcar

Sin territori communal enteifer il vitg e sin certas vias ordeifer il vitg regia in scamond general da carrar per vehichels a motor, motos e mopeds. Excepi ein viadis e vehichels tenor art. 4 e 5 da quei reglament.

Ultra da quei eis ei scumandau da parcar sin terren public sin territori communal enteifer il vitg. Excepi ein ils parcadis signalisai/marcaj corrispudentamein.

Quels scamonds ein signalisai all'entrada dil vitg.

Art. 4 Excepciuns senza lubientscha

Excepius dil scamond da carrar menziunau ei il traffic agricol, forestal e public.

Art. 5 Excepciuns cun obligaziun da lubientscha

La suprastonza communal dat sin damonda lubientschas da carrar per:

- a) vehichels da habitonts, proprietaris da terren, migiurs e fittaders permanents per igl access a lur immobilias (en fuorma d'ina vignetta temporara);
- b) vehichels da furniturs, luvvers, etc. per exequir lur activiad (en fuorma d'ina vignetta temporara per il traffic da lavur);
- c) vehichels da visitaders/hosps da habitonts, proprietaris da terren, migiurs, fittaders permanents, menaschis industrials e da restauraziun locals (en fuorma d'ina carta da visitaders limitada);
- d) ulteriurs viadis che la suprastonza considerescha sco impurtonts e relevonts (en fuorma d'ina lubientscha speciala).

Ils possessurs d'ina lubientscha da carrar han il dretg da carrar cun il vehichel corrispundent el vitg e da parcar il vehichel sin il parcadi privat. Sin terren public eis ei scumandau da parcar era cun ina lubientscha da carrar corrispudenta (dano sin ils parcadis signalisai/marcaj corrispudentamein).

La suprastonza communal sa dar lubientschas specialas. Talas lubientschas specialas valan il medem mument era sco lubientschas da parcar sin terren public.

Art. 6 Lubientschas

La suprastonza communal fixescha las cundiziuns per retrer lubientschas da carrar.

Las lubientschas ston vegnir retratgas tier l'administraziun communal.

Las lubientschas ein buca transferiblas e ston vegnir taccadas (vignettas) sin la finiastra davon aschia ch'ellas ein bein veseivlas, pia buc ella sdrema colorada, resp. plazzadas bein veseivlas ed emplenidas completamein davos la finiastra davon (cartas). Quei vala era per il temps ch'ils vehichels ein parcai sin parcadis privats.

Art. 7 Taxas

Per la lubientscha vegn incassada la suandonta taxa:

- | | | |
|--|-----|------|
| - lubientscha da carrar per habitonts, proprietaris da terren, migiurs e fittaders permanents (vignetta temporara) | fr. | 10.— |
| - lubientscha da carrar per il traffic da lavur (vignetta temporara) | fr. | 5.— |
| - lubientscha da carrar per visitaders/hosps (carta temporara) | fr. | 1.— |

Lubientschas specialas ein buca suttamessas a taxas.

Art. 8 Prescripziuns specialas

Tut ils viadis tenor art. 4 e 5 da quei reglament sa la suprastonza communal scumandar, reducir a certs temps e/ni lubir mo a singulas categorias da vehichels, sche las cundiziuns sin via ein disfavoreivlas ni extraordinarias.

Art. 9 Scamond da campar

Igl ei scumandau sin igl entir territori communal da habitar en tendas, rulottas e vehichels semegliants.

Cuntravenziuns encunter il scamond da campar san vegnir castigadas immediatamein cun ina multa disciplinara da fr. 300.—. La procedura sedrezza conform al senn dalla Lescha federala davart las multas disciplinaras (LMD).

Art. 10 Disposiziuns penalas

Cuntravenziuns encunter quei reglament, cunzun surpassaments dil scamond da carrar e da parcar ed il maldiever da lubientschas, vegnan castigadas cun la retratga temporara ni permanenta dalla lubientscha entras la suprastonza communal e tenor las determinaziuns dalla LitLTV e dalla Lescha federala davart las multas disciplinaras (LMD).

Art. 11 Execuziun

La suprastonza communal ha l'obligaziun d'exequir quei reglament. Ella sa delegar quella competenza a funcziunaris communals.

Art. 12 Entrada en vigur

Quei reglament entra en vigur suenter che la Polizia cantunala ha priu enconuschiantscha dad el e cun l'approbaziun dalla la radunonza communal.

Entochen all'introducziun dallas novas vignettas e cartas restan valeivlas las lubientschas da carrar tenor il reglament vegl.

Art. 13 Publicaziun e signalisaziun

Las restricziuns da traffic decretadas en quei reglament ein da publicar tenor art. 107 al. 1 dall'ordinaziun davart la signalisaziun (OSig) ed art. 7 LitLTV.

La signalisaziun succeda en accord cun la Polizia cantunala.

Approbaus alla radunonza communal dils 26 da mars 2021.

Il president communal

Il canzlist communal

Wendelin Casutt-Cathomen

Adrian Vincenz